



Sabtu, 11 Januari 2025
Ogen: Matius 5:17-20



PUSTAKA SI BADIA UNDANG-UNDANG DIBATA



Geluh manusia arus ratur, e maka teptep budaya lit nge aturen si ibahanna guna komunitasna. Subuk e tertulis ntah pe la tertulis, para tua-tua ntah pe tokoh budaya nai ngukuri orat nggeluh i bas masyarakat gelah mehuli kegeluhenna. E maka erbage aturen ibahan sue ras kiniersadan arihna, janah kerina arus patuh. Dikune lit si ngelanggar lit aturen ntah pe sangsi sosial siibahan man bana. Bage me kalak Jahudi pe meherga kal akapna aturen ntah pe undang-undang i bas masyarakatna. Renungenta wari enda nuriken kerna Jesus si ngergai ras nggenepi undang-undang e. Kerehenna sitik pe labo ncedai undang-undang e, amin i bas khotbah i das Uruk e melala kal i bongkarna kerna kebiasaan si lit i bas masyarakat ras budayana si iberena penekanen si terulin. Banci saja Jesus mpersiapkan kalak si enterem simegiken IA kerna undang-undang enda. Labo sitik pe ertentangen ras si isehkenNa. Jesus ngerana kerna 'pendapatNa' kerna pengajaren Undang-Undang kalak Jahudi. Kerna si e iajarken Jesus, ise si mabai kalak papak maka sitik pe la ia meherga i bas kinirajan Dibata. Si ngikutken janah mabai kalak guna nggeluh rikutken aturenna maka ia me si mbelinna i bas kinirajan Surga. Kalak si bengket ku je, arus lebih tutusen asangken guru agama ras kalak Parisi. Ertina, kalak si bage labo banci bengket ku Surga, arus lebih, bageme fungsi undang-undang Dibata.

Kualitas kiniteken rikut kegeluhen la banci standart, biasa-biasa saja, seri ras kalak sideban. Arus nggeluhken kegeluhen sue ras undang-undang Dibata. Kalak Karo Kristen, lit nilai budaya ntah pe orat geluhta si la petembil ras Kata Dibata, silakokenlah. Tapi dikune la sendalanen, embari ras terangilah alu Kata Dibata. Alu bage perlu kita rusur ngoge Pustaka Si Badia si i je tersurat kerina undang-undang Dibata e. Gelah tangkas si man ikutenken ras si man tadingenken.